

摘藻堂四庫全書薈要

集部

欽定四庫全書薈要

集部

宋詩鈔卷

二百五
二百三

詳校官候選知縣臣吳向華



欽定四庫全書薈要卷二萬三百五十三

集部

宋詩鈔卷一百

內閣中書舍人吳之振編

謝翺晞髮近藁鈔

天地間
集附

福唐黃坤五語余晞髮集近世行本多遺漏曾抄畜

二十餘首皆刻板所無余聞之心往恨其不攜行笈
得一見也從子愚忠自苔上潘氏抄得晞髮近藁一
帙為發狂喜原集古詩大半此多作近體屈蟠沉鬱

吐茹奇艷皆世所未覩豈即黃春坊所謂與然黃云
二十餘首而此編有五十首數既不合且此署晞髮
道人近藁當是末年未定殘草別為一卷流傳人間
又非刻本零星遺漏比也然則黃氏二十餘首又不
知何詩矣惜春坊云亡不得一質證之此帙附天地
間集十餘首即臯羽所編當時諸公詩也按本傳有
二卷此亦不完書潘氏藏本為陸子傅手蹟有題識
子傅名師道吳人

過杭州故宮二首

禾黍何人為守閣
落花臺殿暗銷魂
朝元閣下歸來燕
不見前頭鸚鵡言

紫雲樓閣讌流霞
今日淒涼佛子家
殘照下山花霧散
萬年枝上挂袈裟

重過二首

複道垂楊草欲交
武林無樹着凌霄
野猿引子移來住
覆盡花枝翡翠巢

隔江風雨動諸陵無主園池草自春聞說就中誰最泣
女冠猶有舊宮人

野望

心遊太古後轉覺此生浮天外知何物山中着得愁岸
花低草色潮水逆江流消長盈虛裏令人白盡頭

無題

天風下黃葉山樹挂綠蓑世情逐流水東去無迴波可
與語人少不成眠夜多濕雲黏短髮漂泊奈愁何

春閨詞

手觸殘紅頭懶梳
香隨蝴蝶上衣裾
暖風吹睡無言語
又向牀頭看夢書

四皓

冷却秦灰鬢已翁
紫芝歌罷落花風
若教一出無遺恨
莫入留侯隼擬中

散髮

乾坤一楚囚
散髮向滄洲
詩病多於馬
身閒不似鷗
因

看東去水都是夜來愁
晚意落花覺殘枝香更幽

友人自杭回建寄別三首

同來不同去離別暗銷魂
閩浙若同水扁舟送到門
潮信到巖瀨水色過衢城
寄潮不寄水潮去有回程
水到衢城盡梅花上嶺生
不如寄明月步步送君行

孤山

又冒晴絲向水涯
寒雲冉冉護巾紗
能知綠鬢幾回至
欲作黃冠此處家
已把掖垣等茅舍
不愁封禪對梅花

晚風吹袂過船去看鶴上天衝碧霞

雪

片片知何似無根零亂花任隨飛到處不揀是誰家
縫密天如翳藥深樹半斜城中新酒貴羈旅若為賒

畫秦宮人

宮人字玉姜秦時逃入山是為毛女漢魏間人猶見之
結草為衣類鶴翎初來一味服黃精宮鶯幾處啣花出
猶向山中認得聲

織婦歎

待得蠶蠶繭上絲織成送女去還歸支機本是寒砧石
留取秋深自擣衣

商人婦

抱兒來拜月去日爾初生已自滿三歲無人問五行孤
燈寒杵石殘夢遠鐘聲夜夜鄰家女吹簫到二更

憶湖上

擾擾忽半月征衣雜弔塵頗疑湖上客不是城中人岸

柳垂維縵山雲泣濕巾明朝在何處相怪墮凡身

悼古季清

典刑前一輩言語尚風流詩律縛不住梅花惱得愁雲
烟今變滅老病總宜休喚醒菟裘夢嚴城山雨秋

蠟梅

冷艷清香受雪知雨中誰把蠟為衣蜜房做就花枝色
留得寒蜂宿不歸

留別顧君際

萬里行可到詩人吟到難愁來時自語寫出許誰看月
落望如失山空坐更寒此時多少意欲別路漫漫

後桂花引

修月仙人飯玉屑瑤鴨騰騰何處熟吳剛生愁樹合創
毫飄玉斧高枝折此時待罪扣帝庭素娥騎蟾涕淚零
月中落子如雨星至今收拾無六丁

吳山謁祠

吳山坊頂戴高祠禁地淒涼江水悲却是北人題記壁

迤南耆舊獨無詩

雪後湖堤步歸

無求如有得散策隄邊行
山碧眼花亂水寒毛孔生
窮冬疑有雨一雪却成晴
勞謝天涯月相隨步入城

梅花

春過江南問故家
孤根生夢半槎牙
到無香氣飄成雪
未有葉來開盡花

吹老單于月一痕
江南知是幾黃昏
水仙冷落瓊花死

祇有南枝尚返魂

往姑蘇與友人別杭州

北闕到吳會烟草亦詩情飲少但知價行踈數問程天
陰月不死江濶水能生別後不得寐相思還二更

雪霽有感

夜長春度夢門雪擁芭籬不倚成山積情知有霽時日
高簷白雨氣上瓦如炊風過梅花濕寒香只戀枝

山中道士

山中道士服朝霞二十修行別故家
留客一杯清苦蜜
蜂房知是近梅花

餘杭樵歌

樵斧丁丁響翠微
頰肩半脫汗身衣
因來避雨崑前洞
裏得山蜂和蜜歸

書文山卷後

魂飛萬里程
天地隔幽明
死不從公死
生如無此生
丹心渾未化
碧血已先成
無處堪揮淚
吾今變姓名

十年

忘却寒溫語相逢一揖休十年只如此今日若為愁月
白夜亦晝山寒春更秋無情溪澗水只是下灘流

秋夜詞

愁生山外山恨殺樹邊樹隔斷秋月明不使共一處

除夜舟中遇雪

歲月安有限利名心未灰雪飛今夜止潮去隔年來交
友窮中見江山盡處回家人誰念道耳熱不因杯

元旦舟中聽潮

東望拜潮水無家在客船
一來仍一往今日又今年
有信從天外緣聲到枕邊
海門春樹暖吹浪起晴烟

鷓鴣步尋方元英故居

遺像雙臺下結廬烟水傍
子孫今幾世風雨半他鄉
山靜雲眠影葉乾蟲食香
高名故相壓吟苦不成章

青蘋亭

青山何處是疑是剡溪傍
採蘋無人到生沙滿逕荒
水

交難辨色花和不同香歸路逢樵子麻衣草結裳

題酒家壁

綠陰深處問天涯黃鳥聲中見酒家樹上胡孫摘殘果
向來纔見是春花

正三立春

舟中隔歲話偏仄信誰從山帶去年雪春來何處峰移
軍增野竈落磧減機春明日金華洞牧羊尋故蹤

贈山中友

散策亂山雲值此山林友種松高及身掃葉落隨手斫
盡松上枝縛作山中帚夜夜對西風明月生戶牖

沙岸登舟

五里兒女步虛沙映斷筇雲支半山石帆席上溪風數
雁憐身隻聞鶻願耳聾市橋東畔塔側影夕陽中

僧房疥壁

松樹落釵股曉行猶見燈圓亭方井水老寺少年僧澗
響夜疑雨雲寒春欲層山童錯相認應道我來曾

山居

宿火石中取人烟隔斷霞盜侵鄰壤粟女寄外翁家野
樹刺生葉枯松藤纏花老翁頭未白相對話天涯

望仙都山二首

鼎湖只在柱峯上地險山空不可家山下人居五六月
天風吹雨碧荷花

道人誦經半峯下洞裏山神不敢歸我欲乘風到峯頂
擘翻荷葉作蓑衣

疊山

礪硯復崔嵬晴雲撥不開鐘聞上界響石自太湖來靈
草擣為藥寒松燼作煤欲窮登覽興未到已徘徊

社前

無家借燕住離別又經年客館依山上春分到社前雨
來換宿水雲起暗晴川颯颯吹衣帶因風問去船

艤舟江心寺

數聲清磬出晴暮落木人家散烟霧風送年年江上潮

白雲生根吹不去

歲月

歲月記不得曾行此處村日欹眠石影樹長食藤根晚
羨棲猿鳥春來問子孫勞生空可說不是欲忘言

雪女吟

罨畫溪頭歛翠眉綠楊扶起又低垂春風盡與花為主
不解庭前百結枝

文房四友歎

兵後四友流落有訪而得之者則頂禿足折笏碎幅
裂自秦以來未見吾黨獲禍如此之慘者是以為之
長太息云

昆吾莫耶輕毛錐平生故人皆引去剡溪之楫絳色黔
獨與石君作一處中書間起免冠謝輒被溺冠仍嫚罵
見幾自愧後穆生正恐髡春不與赦有時怒髮豎相如
熟視蒙恬挽其鬚泓尤淪棄敢自愛老龜支牀息猶在
荆山風雨朝暮號璞在吾懷足何罪恨不雪恥酬諸姬

背水一戰漢為池楮生不改舊邊幅三禡何但高閣束
客卿騎項百折磨猶恐玄能赤吾族此時不平義重生
陽城裂麻欲死爭平生國士立橋下誓死守此漆身啞
秋社寄山中故人

燕子來時人送客不堪離別淚沾衣如今為客秋風裏
更向人家送燕歸

天地間集

寄江南故人

則堂家鉉翁

曾向錢塘住聞鶻憶蜀鄉不知今夕夢到蜀到錢塘

南華山

文山文天祥

北行近千里迴復迷西東行行望南華忽忽如夢中佛
化知幾塵患乃與吾同有形終歸滅不滅惟真空笑看
曹溪水門前坐春風

逢有道者

誰知真患難悟此大光明雲散天仍在風休水自清功
名幾滅性忠孝太勞生此意如能會神仙亦可成

山中夜坐

本心文及翁

悠悠天地間草木獻奇怪投老一蒲團
山中大自在

武夷山中

疊山謝枋得

十年無夢得還家獨立青峯野水涯
天地寂寥山雨歇
幾生修得到梅花

溪橋晚興

南谷鄭協

寂莫亭基野渡邊春流平岸草芊芊
一川晚照人間立
滿袖楊花聽杜鵑

錢塘晚望

錢塘江上夜潮過，秋靜寒烟白露多。
吳越青山明月裏，舟人齊唱異鄉歌。

月夜溪莊訪舊

歸田柴望

山山明月露何處，認梅花石色冷疑水。
溪流白是沙清，吟幽客夢華髮故人相見即歸去。
已應河漢斜。

觀水

古為徐直方

滄江無盡水，夜夜隨潮去。若復作潮來，滄江止不住。

秋夜泛舟

橫舟何新之

飛星曳寒影野水淡碧空人生是何物扁舟空影中何
年有宇宙生此木末風有力不向上難到蓬萊宮空攀
棲鷗巢搔首如飛蓬俯仰慨今昔此懷安可窮

歸去詞

石髓王仲素

種松雨濯髮折筍春墮指長嘯歸去來滄江一天水

翫月有感

草堂謝鑰

入夜茶甌苦上眉眼花推落石牀碁舉頭却恨天邊月

顛倒山河作樹枝

退宮人

雲西陸壑

破篋猶存舊賜香
輕將魂夢別昭陽
只知鏡裏春難駐
誰道人間夜更長
父母家貧容不得
君王恩重死難忘
東風二月垂楊柳
猶解飛花入禁牆

散策

菊屋何天定

孤坐忽不樂
出門聊散行
溪喧亂人語
樹偃礙農畊
雨徑莓苔積
陽坡草木明
道逢九十老
相對話承平

西窗

楚處王曼之

西窗枕寒池池邊老松樹渴猿下偷泉見影忽驚去

春日郊行

出門逢柳色忽過野橋西坐石看潮長隔花聞鳥啼地
隨芳草盡樹與夕陽齊不是桃源路行人亦自迷

年年

觀山范協

年年如燕一還家又訪幽居過水涯風雨滿城春欲暮
山中猶有碧桃花

訪隱者不遇

東窗吳子文

道人入山訪道人山深俗朴雞犬馴
道人不見道人去
糞草木無邊春

采菊

韓竹坡

擷我百結衣為君采東籬
半日不盈掬明朝還滿枝
悠然何處是千古正如斯

曉起

曉山林景怡

天雞弄喔咿殘星在斜漢
整衣出幽扉山城漏初斷
微

微水風生冉冉田露散此時遊葛天淡然空百羨海色
上寒梢漸識梅花面

宋詩鈔卷一百

欽定四庫全書薈要卷二萬三百五十四 集部

宋詩鈔卷一百一

內閣中書舍人吳之振編

文天祥文山詩鈔

天祥生時夢紫雲故名雲孫天祥其字也寶祐乙卯領鄉貢遂改字宋瑞又字履善吉州廬陵人廷對第五理宗擢第一歷官較書著作郎至兼學士國史院崇政殿說書玉牒所檢討賈似道以致任要君降

詔多諷語逆賈意奏免始闕文山以居旋起提刑湖
南移知贛州德祐乙亥元兵渡江奉詔起兵除右文
殿樞密權兵部侍郎兵屯洪詔入衛權工部尚書除
浙東西制置使江西安撫大使兼知平江府常州
破朝議棄平江趣天祥移守餘杭進資政殿學士丙
子正月巴延兵至高亭陳宜中張世傑皆遁乃除右
丞相兼樞密至北軍講解遂為所留而臨安降表已
出巴延即脅隨祈請使北行至京口脫走趨真州謀

合兩淮作興復計而制置李庭芝疑拒之復從揚州
逃至高郵嶇崎數瀕死得渡海道至台溫奉益王於
福州改元景炎除觀文殿學士右丞相不拜以樞密
使都督諸路軍事出南劍號召天下繇汀漳入梅州
戰雩都大捷因開府興國元兵大至旋潰妻子女
皆陷奔汀移循州端宗崩衛王立於碭川改元祥興
天祥乞移軍入朝而宜中世傑忌阻之第加少保信
國公張弘範破崖山令弘正襲執天祥服腦子二兩

不死繫至燕不屈囚兵馬司者四年而志愈堅會有
中山薛寶住投匿名書指丞相舉事者司天臺又奏
三台星折乃召至殿中猶欲諭降之語益厲遂遇害
衣帶有贊曰孔曰成仁孟曰取義惟其義盡所以仁
至讀聖賢書所學何事而今而後庶幾無愧詩集不
多有指南錄一卷皆奉使脫難興復記事之詩又有
吟嘯集則囚燕所作又獄中集杜詩二百首自指南
錄以後與初集格力相去殊遠志益憤而氣益壯詩

不琢而日工此風雅正教也至其集杜句成詩裁割
鎔鑄巧合自然尤千古擅場今別為一帙而以指南
錄中十八拍附之嗚呼去今幾五百年讀其詩其面
如生其事如在眼者此豈求之聲調字句間哉

敬和道山堂慶瞻御書韻

墨灑天奎映籀紅斯堂殿閣與俱隆方壺圓嶠神仙宅
溫洛榮河造化工列聖文章千載重諸孫聲氣一時同
著庭更有邦人筆稽首承休學二忠

著作之庭乃胡忠簡公書周文忠公

立

贈祕書王監丞

君不見祕書外監賀放翁鏡湖一曲高
清風又不見太子師傅兩疏氏東門
祖帳羅羣公人生晚節良不易顏
波直下誰障東使人知有在
我者二三君子為有功我
公金華山下住赤松安期白雲處
風骨細瘦真神仙急流勇退不肯
顧我昔山中想風采幾回擊節歸
田疏適來追陪水蒼佩親見辭歸
白雲路御筆擢公領蓬山師

表玉立東宮官兩年苦口一去字未許鷗鷺從公閒瑤
池深深鎖策府玉皇宮闕僑其間暫分赤符管下界半
空雲氣常往還多少持麾辭上國悠悠風塵見此客莫
作尋常太守看疏賀以來偉人物夜瞻婺女次舍中一
點光明射南極公歸眠食重調護世道尚憑公氣力

贈蒲陽卓大著順寧精舍三十韻

人生天地間一死非細事識破此條貫八九分地位趙
岐圖壽藏杜牧擬墓志祭文潛自撰荷鍾伶常醉此等

蛻浮生見解已不易齊物逍遙遊大抵蒙莊意聖門有

大法學者必孔自知生未了了未到知死地原始則返

終終始本一致後來得西銘精蘊發洙泗吾體天地塞

吾氣天地帥一節非踐形終身莫繼志舜功禹顧養參

全類錫類伯奇令無違申生恭不貳聖賢當其生無日

不惴惴彼豈不大觀何苦勤興寐吾順苟不虧歿寧始

無愧人而有所忝曠達未足智卓哉居士翁方心不姿

媚蒙讒以去國七年無怨懟風雨三間茅松楸接蒼翠

斯丘亦樂哉未老先位置宇宙如許大豈以為敝屣當
其歸去來致命聊自遂天之生賢才初意豈無為民胞
物同與何莫非已累君方仕於朝名高貴所萃乾坤父
母身方來日川至西銘一篇書順事為大義請君觀我
生姑置末四字

贈鏡湖相士

五月五日揚子江心水鑄作道人雙瞳子吾面碟子大
安用鏡照三百里

贈秋月葉相士

急流勇退神仙躋
蹙龍鍾將相借問
華山山中何似天
津橋上

贈桂巖楊相士

榮悴紛紛未可期
夕多未振已朝披
德剛難免於今世
行好須看有驗時
萱畫堂前惟有母
槐陰庭下豈無兒
好官要做無難做
身後生前是兩岐

宣州罷任再贈

貧賤元無富貴思
泥塗滑滑總危機
世無徐庶不如卧
見到淵明便合歸
流落丹心天肯未
崢嶸青眼古來稀
西風為語巖前桂
若更多言却又非

贛州再贈

此別重逢又幾時
贈君此是第三詩
衆人皆醉從教酒
獨我無爭且看棋
凡事誰能隨物競
此心只要有天知
自知自有天知得
切莫逢人說項斯

贈葉大明

大明標榜葉氏子自稱後村門下士誤言木吉亭為灾
後村曾發一笑來其師流傳說如此寧知禍福乃不爾
犀腰貂首徒勞人甘藜藜藿無苦辛我生有命殊六六
木亭循環相起伏袖中莫出將相圖盡洗舊學讀吾書

閒居和雲屋道士

一樽聊共此時心文字追隨落醉吟仙子樓臺修竹外
行人寇蓋畫橋陰一年芳草東風老五月空江夜雨深
且作蘭亭歡喜集更論誰後又誰今

遊青源二首

鍾魚閒日月竹樹老風烟一徑溪聲滿四山天影圓無
言都是趣有想便成緣夢破啼猿雨開元六百年

空庭橫蟬竦斷碣偃龍蛇活火參禪筍真泉透佛茶晚
鐘何處雨春水滿城花夜影燈前客江西七祖家

龍霧洲覺海寺次李聞溪壁間韻

名昂英
侍郎

閣黎鐘後訪團蒲江色漫漫晝欲晡一笛梅邊何滿子
千簑蘆外筆頭奴急風吹鴈還家未新雨生濤到海無

本是白鷗隨浩蕩野田漂泊不為孤

山中

滄洲棹影荻花涼款乃一聲江水長
賴有蓴風堪斫膾便無花月亦飛觴
山中世已驚東晉席上人多賦晚唐
何處魚羹不可飯蚤拚泉石入膏肓

山中謾成東劉方齋

名夢桂居南湖
太師公玄孫

東風解凍出行嬉一闌烟塵隔翠微
自有溪山真樂地從來富貴是危機
二三輩行惟須醉多少公卿未得歸

明日主人酬一座小船旋網鰕魚肥

送人往湖南

鴈拖秋月洞庭邊客路淒涼野菊天雲隔酒樽橫北海
風吹詩史落西川夜深鬼火千山雪春後鶻花一樹烟
為我祝融峰上看朝暎白處禮蓬仙

別謝愛山

君今拂衣去我獨枕書眠一片過林雨數聲當戶蟬情
長空有恨吟苦不成篇後會知何日西風老雁天

病中作

一病四十日西風草木涼倚床腰見骨覽鏡眼留眵倦
策吟詩杖頻燒讀易香夜深排果餌乞巧大醫王

又賦

病裏心如故間中事更生睡猫隨我嬾黠鼠向人鳴羽
扇看棋坐黃冠扶杖行燈前翻自喜瘦得此詩清
驟雨知何處一溪秋水生苦吟肩鶴瘦多病耳蟬鳴隱
几惟便睡挑包正倦行山深明月夜乞我半窗清

寄興逃吾病吟詩老此生風高鴻雁起晴久鶉鳩鳴野
樹辭秋落溪雲帶雨行晚涼便懶坐移傍竹陰清

曉起

遠寺鳴金鐸踈窗試寶熏秋聲江一片曙影月三分倦
鶴行黃葉癡猿坐白雲道人無一事抱膝看回文

夜坐

淡烟楓葉路細雨蓼花時宿雁半江畫寒蛩四壁詩少
年成老大吾道付遶遲終有初心在聞雞坐欲馳

題楚觀樓

西風吹感慨
曉氣薄登臨
半壁楚雲立
一川湘雨深
乾坤橫笛影
江海倚樓心
遺恨飛鴻外
南來訪遠音

某叨臬衡湘蒙恩以便郡歸養肯齋大卿實寓衡

我十年前邦君也一再見間即分南北五言啟

之所以致今舊雨繾綣云

李肯齋名芾

瀟湘一夜雨
湖海十年雲
相見皆成老
重逢便作啼
鶻春浩蕩回
雁曉殷勤江
濶人方健
月明思對君

幕客載酒舟中即席序別

故人滿江海遊子下瀟湘
夢載月千里意行雲一方
櫓聲人語小岸影客心長
總是浮萍迹飛花莫近檣

將母赴贛道西昌

重來鷗閣曉帆影漲新晴
倚檻雲來去閉簾花送迎
江湖春汗漫歲月老崢嶸
手把忘憂草夔夔繞太清

翠玉樓晚雨

晚樓一曲轉梅花
官事無多報放衙
林木蔽虧烟斷續

江流曲折雨橫斜
年華冉冉風前影
歲暮悠悠客裏家
一雁近從沙觜落
更饒片雪入天涯

翠玉樓

昏鴉何處落野渡
少人行黃葉聲在地
青山影入城江
湖行客夢風雨故鄉情
試問南來信梅花三兩英

阜蓋樓

一水樓臺繞半空
圖畫開蝸涎行薜荔
雀影上莓苔碧
落人千載青山酒
一杯晚烟看不盡
待月却歸來

雲端

半空天矯起層臺
傳道劉安車馬來
山上自晴山下雨
倚闌平立看風雷

和曹倅賦別

名大發
賴倅

翠松三萬頃松雪著神仙
柳院催金鑰江花送玉鞭
曉巖雲壁立晚棹浪規圓
未了醉翁事重尋賴上田

當年童子見今見二毛翁
海月三秋別江雲一日同
鷗心馳舍北龍尾曳天東
定有延和奏南來寄一通

改題萬安縣凝祥觀

古道松花空翠香風前髻影照滄浪飛泉半壁朝雲濕
啼鳥滿山春日長須信神仙元有國不知蠻觸是何鄉

道人橫笛招歸鶴坐到斜暉上壁璫

相如遊獵賦華櫜
壁璫注壁璫以玉

為椽
頭

山中再次胡德昭韻

不將顏色污黃金落得灞橋驢上吟是處江山生酒興
滿天風雪得梅心觥籌堂裏春聲沸燈火林臯夜色深

人世可能行樂爾重遊不用下晴陰

人生柳絮鬪堅牢過眼春光歎伯勞蜀道謾傳千古險
廬山方許一人高眼前見赤徒妨道耳後生風未當豪
明月蘆花隨處有扁舟自在不須篙

曾見尊前此客哉笑攜塵尾拂莓苔水邊飛雁年年見
湖上新亭日日來酌菊醉餘披草坐探梅吟罷帶花回
北厓尚被剛風隔笑殺匆匆上馬杯

周蒼崖入吾山作圖詩贈之

三生石上結因緣
袍笏橫斜學米顛
漁父幾忘山下路
仙人時訪嶺頭船
烏猿白鶴無根樹
淡月疎星一線天
為我醉呼添濛瀼
倦來平臥看雲烟

宋詩鈔卷一百一

欽定四庫全書蒼要卷二萬三百五十五

集部

宋詩鈔卷一百二

內閣中書舍人吳之振編

許月卿先天集鈔

月卿字太空婺源人後字宋士人稱山屋先生小
名千里駒字駒父從董介軒於程正思朱子門人也
又受學魏鶴山有志當世入江淮幕中以軍功補校尉
詔罷鷗弁就舉制以易魁江東廷對觸史嵩之見抑賜

進士及第授司戶參軍復率三學訟權相理宗目為狂
士歷官府學教授復以上言小相失職相免得留尋改
江西提舉常平六年不就既至治政廉肅人號為鐵符
循承直郎浙西運幹賈似道當國以月卿試館職言不
合罷去買田宅于姑蘇已而散之歸故里閉門著書號
泉田子從游者翕然德祐乙亥欲以月卿開閩東圖未
幾宋亡深居一室但書范滂寢所乘車數字不言幾十
年而卒年七十謝疊山嘗書其門曰要看今日謝枋得

便是當年許月卿
月卿則自比履善甫
蓋無媿三仁焉
箕山

箕山惟一瓢
襄邑亦四壁
古今一許氏
傳家以清白
茶山與東萊
三詩映圭璧
後來二三賢
題品互紬繹
南軒推學授
晦翁要事實
亦有小東萊
經濟亦何切
極意深源流
敷殖久大業
臨川有二許
我來秋蕭瑟
撫卷三歎起
寒花香的皜

京城看月

幾千萬里碧琉璃中有一圓光照之更無一物可與對
部勒星宿光陸離憶昔看月大江頭天地中間風吹衣
凡客無緣相賓主獨攜杯酒獨吟詩祇今千門萬戶閉
良夜京華無人知似我快活更有誰故山今宵月更奇
明日懶人真箇歸

故人

故人歸作山中相老我聊乘雪夜舟細君頗訝不入市
山中訪友將何求扉屨資糧奪之去毀車截鐙挽予留

一笑謂汝賢細君無求我乃肯出遊宰相良解軒輊子
定難屈膝低我頭同雲一色天欲雪夜深雲散月明樓
題明皇貴妃上馬圖

開元天寶號太平快活三郎偏縱情帝閑天驥雲雷駛
回首絕憐妃子醉海棠酣春睡未足扶上馬時顏山玉
二璫兩邊扶蹋鞞羣姬爭扶不用命萬花叢玉山花花
朝王醉牡丹共立馬前黃幘綽獻笑容顏似嘲謔三郎
勒馬頻回頭兩手按膝雙凝眸夾立兩旁御弓箭帶御

器械如行殿二璫相語儼相向貴妃未至龍顏望龍顏
不怡吾曹憂昵昵私語雙燕秋御前兩驥立仗俟御龍
整暇聊緩轡卷中何止數十人十人眼只在一身朕能
墜馬替妃子不忍花飛驚玉體三郎但念妃子醉豈知身
醉誤國事無鹽為后能彊齊夙夜警戒雞鳴詩花鈿安
得紛委地馬嵬安得有墜時

涉世

涉世如溪谷只宜在淺處一生如一日未暮早歸去君

不見偉哉男子韓淮陰
往往正坐涉世深
功成身退豈不好
當時何事歸不早
人生少年須立事
生我不應負天地
了却君王事
便休去時莫待雨淋頭
如今版圖半烟霧
眼看流離無限子
取將舊物還君王
襁褓赤子寢之床
青天白日正停午
歸去彈琴鶴對舞
靜與賢傳不闕
春風吹袂浴沂天

新安

新安別無奇
只有千萬山
千山萬山中
其奇乃出焉
下

者為硯石與世生雲烟高者無繫累飄然出神仙忽生
朱晦庵追千萬世前示千萬世後如日月當天嗚呼新
安生若人不知再生若人是何年

木犀

詩到黃初上高標不肯唐

先師鶴山魏文靖公嘗和唐人小木犀詩

分封在

香國筮仕得黃裳錦書纍金印瑤英案玉皇黃香天下
士誰得並清芳

雲邊

雲邊人種麥天際客歸舟
月色輕寒夜笛聲何處樓
久晴人渴雨倦仕我思休
高士傳聞看東籬花正幽

甥館

冬至思吾姪樊川示阿宜
驅羊官易取觀象易難知
不遠復三字大音聲一詩
屏山宗邵子晦木不忘歸
醉鄉真廣大靜夜絕囂塵
月色明如晝天涯總是春
鳥飛林不夜蝶夢路無人
天地中間我孤高誰與鄰

同滕推游朱緋堂

當日朱緋夢荒烟化鶴城斜陽邊草色深樹裏禽聲欲
雨路微濕出雲山半青神游應故里只欠愛翁亭

閒賦

老大天諳練殷勤月往還岩巒有奇操泉石亦清談隔
浦飛秋葉開窗看夕山天心端正月潭水夜深參

捧硯姬空翠二首

捧硯姬空翠隨琴鶴曉烟夕陽更山外流水自樓前芳
草垂楊地和風麗日天戲游看處處明媚自年年

看山車放慢過水馬爭先須信一年景無如三月天露
花如此好烟柳十分圓客醉不須去竹牀相對眠

飯了

飯了庵中坐高情等寂喧井泉春戶口篆火午香烟句
好堪呈佛心空不問禪一聲天外雁秋意滿徽絃

神靜

神靜何須卜心間即是仙芋煨牛糞火瓢滴馬鬃泉綠
染春風柳紅勻曉露蓮明朝晴景好一棹盡平川

次韻李制幹贈行

科舉有衣鉢臨行問細君梅花入征夢楊葉礪功勳儼
對丹墀日捷排闥闔雲政須及邊事毋惜齒牙論

次韻雲岩

權輿於我屋渠渠久敬如君世莫如明月清風詩滿案
好天良夜酒連車樽前遠韻輕盈菊醉後分題爛熳書
凡此坐中人十九鈞樞玉帶客金魚

次韻程愿

二李歌行醉裏歌君溪雨棹我烟簑鳳凰臺上我山墅
虹馬軒高君月坡曉徑澁間追李杜夜窗灰裏撥陰何
長哦歲晚成二老詩社往來君肯麼

入邑問炊中雲招王希聖起龍

希聖平生詩酒豪居然閉戶學孤高不知昨夜秋風柳
得似當時春日桃別去半年猶旦暮胸中百痒欠爬搔
虎溪破戒君須解已辨清詩與濁醪

追賦暮遊

余以庚子之冬離廣陵將肄奉常試業于京師舟泊
無錫日已暮與王希聖微服遊南禪蓋訪古也參寥
題名壁無恙寺記有碑碑陰結字甚偉視之蔡京也
出門烟樹蒼然數僧偶語而已余與希聖却立四顧
曰此佳景也當寫之為詩而舉子業亂其中不能就
暇日追想宛在其目為詩以寄希聖其明年冬十一
月也歲月驅人又可一慨

錫山舟泊似荒村微服南禪古跡存壁上姓名今已遠

碑陰人物了能言
薄遊草草月侵岫
遠思悠悠風滿
軒攜手出門烟
樹密數僧離立
語黃昏

寄題岩經樓

樓中圖史澹爐熏
中有成都較藝文
手澤存焉生舊感
心傳妙處長新聞
世科事業無如子
經學源流可致君
祇恐校讐天祿閣
猿啼樓外滿溪雲

滿城風雨近重陽

滿城風雨近重陽
一舸烟波入醉鄉
心事已同鷗鳥白

眼界空有雲山蒼酒安能管興亡事菊亦頗復時世粧
何似長歌明月裏月明天濶地更長

挽座主吳倅

菊翁去後菊園荒壽不如花儘自香進學解成誰貝錦
題輿字濕已黃梁衆流出壑三秋暮明月照松千仞岡
冷落僧爐數間屋但留名節付賢郎

挽李左藏

少年謂子氣橫秋壯已邊城汗漫遊筮仕弗如歸亦好

讀書未了死方休半生懶意琴三疊千古詩情土一丘
月落錫林烟露冷松風無籟自颼颼

次韻朱塘

淳祐二年春王正月丁巳許月卿過滕滕子曰子嘗
遊朱塘乎曰未也曰淳熙之三年朱文公歸故鄉遊
朱塘山深水靜荷華其間慨然曰是吾夢游所也此
誰之土於是先大夫拱而進曰先業也先塚在此文
公曰是宜為亭以領山水子取幅紙吾為若書以告

同志者共成之先大夫雅謹畏時又少四顧無楮筆
則已異時為鉛鈞言以為恨常試與子遊乎遂如朱
塘歸相與為詩秋八月亭成郡丞秘書郎書其扁曰
晦庵亭滕子以詩來有晉之者冬十月詩成月卿用
韻亦賦之

游子從來悲故鄉歸來襟袖正蘭芳夢魂飛去雲濤遠
杖策閒行秋水光可是夢中曾到此安知身後却餘香
紫陽弟子有賢子卜築新亭真肯堂

辭賈徽州

東書歸去訊梅花底事
靈英故故斜約住忙中千里鶴
羨渠如意兩歸鴉家中見雪念為客
客裏觀梅不似家
園樹暫時相關白明朝休向我儂誇

三月

三月春如年少時了知造化最兒嬉
智行無事柳飛絮
道發自然花滿枝錦繡園林添富貴
神仙院落鬪清奇
老夫長似春三月遊戲人間不皺眉

春日閒賦

數行竹樹鳴春雨一簇人家帶曉烟
省事山丹自籬落
親人海燕並庭簷樓高思遠天
無極酒罷歌闌月正圓
新茗一甌香一篆與君清坐看風簾

中秋謝施婺源爰

高情古意滿溪樓靜拍欄干儘兩眸
月不露圭天有道
風能闕谷水無愁從吾所好萬青壑
捨我其誰雙白鷗
別樣主人情重處不將紅妓浣中秋

浴罷

浴罷披襟竹影斜
客中殘暑散空花
人行窗外雲無脚
月起林間燈映紗
舉酒聞鐘知近寺
談詩食李却忘家
明朝又浴還來此
何必開樽只煮茶

仲春初五日報謁

玉磬蒲團出定音
謁酬與世費浮沉
徑松參漢周官肅
塢竹藏雲商易深
暮色溪山皆有道
春風花草本無心
年來年去頭成白
斗酒樓前明月斟

多謝

多謝東皇着意晴海棠勻起笑相迎園林富貴向千萬花
柳功勳已十成曉雨有情於芍藥春風無處不流鶯扁
舟水長一篙許茶竈筆床聊意行

厭厭

厭厭夜飲忘更深客不來辭主有情僮僕觸屏成蝶夢
姬姜壓笛作蟬聲月如有待行行慢風不生嗔細細清
萍散人生何可料嬋娟千里共交盟

項似道眉子硯

集賢得子同年湯東澗所贊眉子石輒贈梧岡命許
某賦之得一首

新安硯石舊多奇硯入黃扉得所歸呵水浮雲尤物視
傳衣半夜偉人知坡仙為欠十眉詠李及何妨一硯持
堪笑泉石老居士無端渾沌盡新眉

次周尚書

詩律無寒

闕

鄴州家風洗耳

闕

侯

闕

傳以酒為真印

萬法惟梅不共流，幸免五經嘲笥腹。
可無百尺進竿頭，從來此道飄零甚。
戎索惟憑疆以周。

平原平等視青州，不佛不仙仍不侯。
滿樹絲蘿天富貴，半窗水墨月風流。
皆云臨濟具雙眼，且放東坡出一頭。
劈畫尚能千百歲，須臾一笑跨商周。

暮春聯句

清廟朱弦瑟羔羊，素絨風釣竿漁艇。
小園徑李蹊通白，酒渾忘送皇天。
似不公風簷開秀色，雪嶺現酥胸。
王化

殊無外聖賢時復中人稱君子子卿自密翁翁從喚酒
經癡聊紓花史忠前知安用卜定見不妨江橋僕使令
熟竹君家計豐六年無不可三語將無同柳子慣乞巧

韓公不送窮

只為士大夫
道个乞字慣

沃心禪帝學古道暢皇風天下真無敵君前置一通將
拚龍尾硯去作魚頭公筆底瀾翻舌談間磊塊胸通明
雲殿上清切玉堂中發軔同安簿深衣獨樂翁孝經題
幼志治鑑見精忠元祐龍蛇雜開禧蝨賊訐隆冬老儒

立奸黨一碑豐三晉春秋在千年綱目同長天照孤憤

清夜好研窮

徐字不晉帖楚詩無國風

山谷誦東坡我詩如曹鄴淺陋不成邦公如大國楚吞五

湖三江十五國風無楚詩蓋外之也

天邊長劍倚花外小車通不肯吏文

叔誰能書子公二三豪俊骨數萬甲兵曾柳暗琴三疊

梅殘酒一中羨君屠龍技笑我祝雞翁擊壤浮兒智編

橋度蟻忠行春奉寬詔佩犢弭兵訶天濶吟邊遠月明

詩擔豐秋光宦情薄鸞鶴嘯聲同清澗耳堪洗深山目

更窮

千年

千年光景東西漢一把春風大小喬坐嘯行吟芳草碧
杜鵑時節雨瀟瀟

人間

人間瀟灑柳塘仙三遣詩來各四篇安得左螯右杯酒
與君爛醉柳塘邊

途問伍

乍雨乍晴寒食候
半花半蕊山礬香
老農甚喜天意好
日暖今年不凍秧

車中

路平正好坐車中
時有禽聲山翠濃
憑軾斜眸看法帖
開簾正面受春風

白雪

白雪家家拆蠶箔
清風行行入秧苗
半開猶蕊花情遠
久雨初晴禽語驕

槐影

槐影本來惟戴日
蟬聲固自未知秋
斜陽薄雨羊歸徑
冷月橫星人倚樓

吟蛩

吟蛩不管興亡事
舞蝶那分夢覺身
別浦連檣歸遠客
高山小徑過樵人

朗湖道中因見二事信筆二首

屋下種花簷露滿
窗前疊石岫雲生
春風不解分疆界

本自無心却有情

烏鵲逢鸛皆憶鳳
鷓鴣遇獺等求魚
秋風雪散天無極
清曉冥冥鴻影孤

新安道中

白水黃山天一青
雪梨金柳雙眼明
要知來日清明日
請聽鶉鳴第一聲

無山

無山平野雲天濶
有月高樓烟水微
渴睡車中鶯一囀

愁吟路上蝶雙飛

題劉後村所跋楊朴移居圖

曾對君王已放還
何須當道把漁竿
使軺將宿人將避
拗折漁竿趕入山

宋詩鈔卷一百二

欽定四庫全書蒼要卷二萬三百五十六

集部

宋詩鈔卷一百三

內閣中書舍人吳之振編

林景熙白石樵唱

景熙字德陽號霽山溫之平陽人也咸淳辛未太
學釋褐授泉州教官歷禮部架閣轉從政郎宋亡不
仕客於會稽王修竹英孫之家會楊璉真伽發宋陵
英孫使客收其棄骨景熙得高孝兩函與唐珏所收

者葬于蘭亭樹冬青以識庚戌卒于家年六十九所
居在白石巷詩六卷曰白石樵唱大概悽愴故舊之
作與謝翹相表裏翹詩奇崛熙詩幽宛蛟峯方逢辰
曰詩家門戶當放一頭非虛言也

商婦吟

良人滄海上孤帆渺何之十年音信隔安否不得知長
憶相送處缺月隨我歸月缺有圓夜人去無回期回期
倘終有白首寧怨遲寒蛩苦相弔青燈鑒孤幃妾身不

出幃妾夢萬里馳

鄭宗仁會宿山中

宗仁撲翁也號初心平陽焦下人太學釋褐出身仕至國子正

挑燈懷舊夢移席近春泉
共話忽深夜相看非少年
斗垂天末樹燐出雨餘
田亦有茅簷下飯牛人未眠

獨夜

客鬢雙蓬老拾遺一燈明滅酒醒時
百年回首忽成夢萬竅有聲皆是詩
殘夜月枝烏未穩故鄉水草鴈多饑
袂衣初試新霜冷欲折黃花寄所思

答周以農

平陽睦源人號稼村

一燈細語煮茶香雲影霏霏滿石牀
萬里夢魂形獨在十年詩力鬢俱蒼
山空絡緯悲秋雨水落蒹葭足夜霜
未會漆園觀物意酒闌猶發次公狂

題陸大參秀夫廣陵牡丹詩卷後

南海英魂叫不醒舊題重展墨香凝
當時京洛花無主猶有春風寄廣陵

歸自越避亂海濱寒食不得祭掃

持酒無因灑墓松禽聲花色慘東風去年此日身為客
及到家山又客中

道中

程入江鄉宿新炊飯帶沙亂山愁外笛孤驛夢中家野
水平菰葉春風足棟花西來三兩客閒說舊京華

歸白石故廬

四鄰井竈出荒墟獨鶴歸來認舊廬一徑蒼苔供瘦策
半簪華髮伴殘書斜陽巷陌語初燕新水池塘生細魚

小立春風憐寂寞
忽吹花片入襟裾

春暮

乾坤萬事上眉端
寂歷東風獨倚欄
白髮餘春能幾醉
綠陰細雨不多寒
香飄苔徑花誰惜
影落沙泉鶴自看
碧眼野僧知我意
素琴攜就竹西彈

酬潘景玉

平陽人

喚起離愁落木聲
抱饑猶自向書耕
江湖有夢追前事
天地無根笑此生
歲晏斷鴻羈客影
夜深殘火故人情

幸來相就分岑寂
閒對梅花酌翠觥

用韻寄陳振先同舍

心事淒涼寄鴈聲
石田苔滿未妨耕
西風戍角催年換
殘夜江樓見日生
煮茗敲冰貧有味
看花隔霧老無情
湖山猶憶笙歌底
笑領春香綠滿觥

春感

柳花袞雪春冥冥
溪風一夜吹為萍
萍隨風去渺流水
人生無根亦如此
故山入夢草芊芊
半窗疎雨寒食天

曉來白髮稀可數多少朱顏化黃土高原冉冉青烟斜
麥飯灑松能幾家子規叫殘金粟暮齒紙蘭亭已飛去
宿台州城外

荒驛丹丘路秋高酒易醒霜增孤月白江截亂峯青旅
鴈如曾識哀猿不可聽到家追此夕三十五郵亭

贈天目吳君實

天目山在臨安縣西五十里

詩興翩翩度雪溪巖雲猶護舊留題夢回殘月蒼梧曉
家在春風秀麥西萱草堂深衣屢寄桃花觀冷酒重攜

故山石鏡無人問，空與寒猿照影啼。

新春

衰顏憑酒潤，故國得春新。
兵草兒童長，風霜天地仁。
草心懸落日，柳眼看行人。
擾擾紅塵者，知誰效角巾。

鄭氏西莊

不踏紅塵道，結廬依水鄉。
遠峯開宿雨，高樹表初陽。
犢卧野門寂，鴈飛秋稻香。
午橋花竹地，回首已淒涼。

酬潘景玉

讀史雙眸夜炯然一聲江雁落燈前馬非汗血材終下
木或青黃性不全風月未容詩入務乾坤應許酒為年
寒城日出無窮事老耳山中獨聽泉

答柴主簿二首

名杰號觀
齋瑞安人

相隔雲江有夢尋篇詩寄舊重兼金山林未遂麋麋性
風雨空愁葵藿心老氣十年看劔在秋聲一夜入燈深
銅槃消息無人問寂寞西樓待雁音

閒采秋荷自製衣相逢舊雨語依依學窮科斗心空老

夢跨蟾蜍肉不飛幾喚江帆和雁度長歌巖戶見雲歸
何須化鶴千年後城郭人民半已非

寄周計院

埏瑞
安人

海桑變紛紛秀色見孤嶼山林華髮尊黨遂深衣古獨
餘鈞天夢翛然在巖戶翳翳挂魄灰沉沉槐夢雨江濤
豈不深修鱗挂網罟不知義井船秋風繫何許

溪行

風高餘暑盡獨策興悠然野色延幽步秋聲入暮年日

斜禽影亂水落樹根懸回首故人遠城笳吹夕烟

仙壇寺西林

古壇仙鶴杳野鹿自成羣松氣浮清曉經聲出白雲石
穿僧屋過水到寺門分人世無窮事山中了不聞

寄鄭宗仁

城南懷舊別谷口寄春耕野鶴巢雲老林僧管瀑清養
花疏石髓煉藥伏山精見說孤燈雨年來著易成

哭郭同舍

宜孫

寂寞青燈舊流離白髮新病猶依故國死乃見全人殘
墨家無子高風墓有鄰斯文堪一哭落日冷湖濱

答鄭即翁

初陽蒙霧出林遲貧病雖兼氣不衰老愛歸田追靖節
狂思入海訪安期春風門巷楊花後舊國山河杜宇時
一種閒愁無着處酒醒重讀寄來詩

東山渡次胡汲古韻

汲古名僑號
天放嚴州人

客來持酒灑烟霏空想高風意欲飛老洞藏雲安石臥

孤舟載雪子猷歸一川白鳥自來去千古青山無是非
欲上危亭愁遠眺廢陵殘樹隔斜暉

贈秦霞真士祈雨之驗

沖真平陽人姓吳氏

火旂焰焰燒坤垠蒺藜滿道風揚塵槁苗無花不作穀
老農扶杖田頭哭哭聲不為填溝渠室罄何以供官輸
檄龍唄佛寂不應蜥蜴那能擅灌柄秦霞真士鞭風霆
綠章叩天天亦驚玄雲沛雨起膚寸點點都是盤中飯
須臾收斂歸無聲翩然駕虬出山城我聞調元功自古

亢為常賜伏常雨廟堂有道司牧良坐看玉燭開金穰
淮南捕蝗蝗更在饑蛟齧人陸成海肥羊日日供大官
論功乃使專黃冠真士寸田無水旱天機子夜交離坎

哭德和伯氏六首

季德淵先
六月逝

棣隕雙葩淚灑紅百年已短更匆匆
祇今風雪栖栖影地老天荒一箇鴻

風塵何處託清魂家世梅花水月村
舊篋已無封禪藁獨憐渴病似文園

空遺破硯孤心苦只博生綃兩鬢華小婢燈前泣秋雨
竹房不見夜呼茶

溪冷浣花宗武哭池荒夢草惠連愁行人猶說春風夜
燈影書聲共水樓

伯兮癯似松間鶴季也孤於雲水僧昨夜夢中聞笑語
覺來秋在影堂燈

草枯霜白泣原鴿五十三年老弟兄風雨對牀緣未了
荆花重合在來生

山窗新糊有故朝封事藁閱之有感

偶伴孤雲宿嶺東
四山欲雪地爐紅
何人一紙防秋疏
却與山窗障北風

僧門

一閒每笑不如僧
及到僧門未能
昨夜褐袍風雪裏
隔溪犬吠入林燈

雜詠酬汪鎮卿

名鼎號桐
陽平陽人

百感湊孤夜
江樓起呼月
秋蟲聲轉悲
念此衆芳歇
人

生非金石青鬢忽已雪
踰淮橘心移出山泉性
汨猗蘭抱孤芳不受宿莽沒

淪惡易如墜進善難如登
危哉方寸地風雨吹冥冥
尺水增丈波鰕鱖亦為鯨
海桑空變易天地終清寧
感此坐中夕疏林動秋聲

垂垂大厦顛一木支無力
精衛悲滄溟銅駝化荆棘
英風傲几礎濱死猶鐵脊
血染沙場秋寒日亦為碧
惟留吟嘯編千載光奕奕

權臣坐偃月棄官如飄蓬及茲顛沛秋翻然挺孤忠一
死未得所網羅挂秋鴻渡淮已不食蛻槁夷齊風何人
續遷史表為節義雄

趙奧別業

在平陽城西二里馬鞍山下

已無湖海夢漸老足閒情野杖日尋壑家書時到城開
池納天影種竹引秋聲亦愛簞瓢樂年來世味輕

新昌道上

江湖猶是客歲月已成翁仙路重雲外人家落木中山

痕經燒黑土脉入泉紅又得春風信孤花照驛東

錢盛景則教授

台州黃岩人
職教平陽

空明仙人朝帝所跨鶴凌虛墮霜羽洞中石髓流不乾
聖泉瀉入君肺腑潘江陸海一目盡自提修綆汲千古
碧芹水冷涵夜燈丹鳳山空鳴曉鼓有時白戰風騷場
小巫見之縮雙股飯雖不足仁義腴墻陰老薺羹味苦
丈夫出處各有道天地網常要撐拄俗吏惟知騁刀筆
腐儒亦或拘訓詁雲霧窗寒森寶書廣文袖有修月斧

離亭酒短秋帆開雁蕩峰前桂花雨

元日即事

宿霧沉城海日遲十年冉冉鏡中絲江湖舊夢衣冠在
天地春風鼓角知杜曲桑麻歸已晚尚平婚嫁畢何時
野人問我行藏事自向庭前采栢枝

燈市感舊

舊夢仙山駕海鼇飛梅如剪柳如縑千門疑是繁星落
九陌不知明月高零亂遺鈿空宿草昇平疊鼓散春濤

寒燈寥落殘書在獨抱荒愁寄濁醪

括城

處州古
為括州

寒芒會動少微星一水溶溶疊嶂橫落日漁舟吹遠笛
斷烟戍屋帶荒城沙鷗欲近如招隱闕樹無多亦厭兵
却憶鶯花亭下路太平簫鼓沸春聲

答唐玉潛

越州人名珏與霽山同
收宋凌骨各葬義士

吠吹孤心老未衰一籬瘦菊一瓢詩黃埃赤日謾多事
蒼狗白雲能幾時山酒栢香春壽母案書芸冷夜呼兒

橫琴妙在無弦處何必知音有子期

陪王監簿宴廣寒遊次韻

亭四畔皆植木犀名廣寒

銀橋疑駕海天長丹粟離離照翠觴影浸山河瓊殿冷
舞深風露羽衣香亦知廣莫元無野却笑溫柔別有鄉
手折一枝驚昨夢素娥憐老授玄霜

酬謝臯羽見寄

南劍人名翺

入山采芝薇豺虎據我丘入海尋蓬萊鯨鯢掀我舟山
海兩有礙獨立疑遠愁美人渺天西瑤音寄青羽自言

招客星寒川釣烟雨風雅一手提學子屢滿戶行行古
臺上仰天哭所思餘哀散林木此意誰能知夜夢繞勾
越落日冬青枝

重過虎林

虎林山在錢塘舊治北半里亦曰武林今為郡稱

漠漠江湖夢蕭蕭黍黍秋清笳吹落日白髮過西州池
涸神龍逝山空老鳳愁惟餘闕外水寂寞自東流

西湖

繁華已如夢登覽忽成塵風物曠西子笙歌醉北人斷

猿三竺曉殘柳六橋春太一今誰問斜陽自水濱

孤山

林逋
隱處

回首咸平夢清風自滿湖乾坤一士隱身世此山孤鶴
去空秋影梅開尚舊株耳孫今白髮持酒酌寒蕪

葛嶺

度宗賜賈似道
第于西湖葛嶺

不讀霍光傳炫然桃李門湖山變朝市烽火滿乾坤
落冰天騎魂飛瘴雨村春風吹秀麥誤國竟何言

寄別諸公

盍簪譚舊夢持酒送餘春
天地綠陰雨江湖白髮人
時平銷劍氣客久積衣塵
又出重關北斜陽獨問津

會嚴陵邵德芳同舍邀宿玄同齋道舊有作

市槐夢忽醒喬柯落風雨
何人斧為薪遺根尚依土
緬懷赤煒初鬱若翠蛟舞
其下有橋門雍雍冠帶聚
萬物遞衰盛千載一仰俯
射策君先登氣勇不再鼓
邈迴三舍間我亦躋寸武
雲雷膏尚屯有志良獨苦
空山少芝薇大澤多網罟
爾來涉長途征衣拂天姥
遙泛松江舟

薰風采芳杜故人隱雲間九山青照戶相逢各華顛舊
事不敢吐悠哉抱玄同高臥標枝古

雲間懷古

薰風短棹水粼粼老鶴疎林寂不聞內史祠荒殘碣雨
黃門書冷半堆雲獵場斜日分桑塢馳道深秋走鹿羣
寥落一觴誰弔古漁鄉烟景客平分

蘇小小墓

錢塘名倡有墓在嘉興縣西南六十步

歌扇風流憶舊家一丘落月幾啼鴉芳魂不肯為黃土

猶幻燕支半樹花

京口月夕書懷

鎮江路也

山風吹酒醒秋入夜燈涼萬事已華髮百年多異鄉
遠城江氣白高樹月痕蒼忽憶凭樓處淮天雁叫霜

新豐道中

丹陽地名

長飈卷炎埃澄空出秋素迢迢鐵甕城回首隔蒼霧
酒帘颺荒市笳鼓發深戍倚篷問舟人云是新豐路
籬落雞欲棲野水牛半渡不見抱琴人斜陽在高樹

石翁媪

在丹陽

束艾楚俗愚鑄金秦民怖何年斲雲根偶立此翁媪千
春衣莓苔偕老食風露世人輕結髮覆水或旦暮乃習
無情緣永與天壤固停舟一訪古久欲祛此錮父老向
我言曾是梁朝墓衣冠化黃土古丘亦成路當年殉金
棺茲物獨如故閱世如過客興亡了不悟時借牛礪角
敲火戲童豎

舟中書事

村酒沽來濁可斟，扁舟過雨繫楓林。
午香吹稻海田熟，秋蔓引瓜茅屋深。
天地暗塵歸客鬢，江湖斜日動鄉心。
衰年自笑為形役，空羨閒鷗臥水陰。

練川道中次胡汲古韻

客中還又客，回首憶并州。
一枕江湖夢，五更風雨舟。
水寒荷葉老，蟲響豆花秋。
幾度看雲坐，吾生亦覺浮。

過吳門感前游

回首前游夢未忘，江雲漠漠樹蒼蒼。
客心空老鷺花月。

詩貌不肥魚稻鄉白虎氣銷遺瘦石綵虹影冷卧斜陽
當時已歎殊風景後二千年更斷腸

宿七里灘

寥落空江上買魚開酒尊亂山含雪意孤艇寄楓根灘
近不成夢鴻飛欲斷魂偶呼黃帽語一犬吠前村

宴德初書樓

姓陳氏
平陽人

樓高不二尋已作百尺想中有湖海豪開襟納萬像頗
延素心人談笑落清響鄰花吹午香簷竹薦秋爽於中

了行藏此外斷俯仰西樓富熏天歌鐘樂華敞荒涼風
雨餘山夔自來往

鹿城晚眺

郭璞卜東嘉城基有白鹿
銜花而出故名為鹿城

古城仙鹿遠百感赴斜曛海氣千年聚山形九斗分神
鴉饑啄蘚宰木蠹藏雲何處鳴鉦發春屯又易軍

初夏

春歸不知處溪棟日初長舊篋題詩扇疎簾讀易香田
蛙占水旱海燕語興亡復恐閒愁起聽泉過石梁

過陶嶺有錢王井又三里有錢王石菴

在越州即陶山嶺也

沙井泉初試石菴苔已荒不知更宋代猶自說錢王古
塚木根怪春山雲氣香詩成無紙筆駐馬語殘陽

訪武伯山居

在舜田下

照書雙眼碧天欲壽斯文白髮前朝士青山半屋雲遲
花春後見遠瀑夜深聞回首重華夢荒田自鹿麕

客意

獨夜愁如此殊鄉老奈何故人經亂少歸夢入秋多衣

敝鄰礎動書沉海鴈過燈前空拂劒酒薄不成歌

潘山長入括

潘平陽
白石人

為官轉多事行役到寒羶落日隣州樹西風逆水船飯
牛懷白石訪鶴入青田我欲看行卷仙峯雪瀑邊

元日得家書

爆竹聲殘事事新獨憐臨鏡尚儒巾寒窗琴冊燈花曉
衰鬢江湖栢酒春道在老天扶容健書來稚子識家貧
舊山亦有閒風月歸與漁樵作主人

次翁秀峯

温州在城人

花柳湖西別此翁十年鬢雪忽重逢
唐陵愁問永和帖
楚水夢聞長樂鐘
黃妳秋燈餘舊癖
素侯野服拜新封
世情雲雨何時了
千古青青太玉峯

寄七山人

平陽州治北五里有七星山鄭初心先生隱居于此稱為七山人

十年疎鬢為誰斑
天借儒冠日月閒
欹枕寒生雙瀑澗
開門春滿七星山
鶴歸尚覺遼城是
鷓老空聞蜀道難
欲覓九還憑寄語
青牛何日度函關

和王德游夜感

子監簿

小池荷靜雨初晴世念消磨未到僧衣帶長江空北固
觚稜舊月隔西興一春空負花前酒獨夜相知竹下燈
自笑老來甘鷓退少年雲路健追鵬

洞霄宮

洞天有別雲福地無凡土嘉名此兼擅靈氣適專聚峰
巒互重掩雲霧自吞吐飄然乘冷風一瓣謁瓊宇住山
老黃冠迎客琪樹午魚魚美少年華裾集齋鼓往者修

鍊人飛昇接高武爾來何寂寥山川亦今古甲第疑王
侯億萬富倉庾所以氣體移學道不精苦吾聞郭許傳
卓菴老林莽終日對白雲餐松飲石乳

大滌洞天

九鎖絕人寰一嶂聳天柱自從開闢來着此洞天古奇
石千萬姿元不費神斧帝勅守六丁山變孰敢侮白晝
中冥冥游者必持炬或絢若霞敷或感若波詭或豎若
旌幢或懸若鐘鼓或虎而爪踞或鳳而翅舞異狀紛獻

酬清音起擊拊不知金堂仙恍惚在何許
褰衣下側徑層嵐結瓊乳徑極躡轉深幽潭
蓄風雨劣容童豎入恐觸蛟龍怒凜乎不可
留長嘯出巖戶

天柱峯

誰作孤峯紫翠巔
流泉一脉到宮前
却憐千尺擎天柱
不拄東南半壁天

神仙隱跡

仙子渾無涉世勞
屐痕一尺寄孤高
幾人失脚風波裏

可是雲根立得牢

陳子植草廬成求予賦

老矣杜陵客草堂倚江干故人相幽築皇天愍生還君
家付楚炬結構當時艱謂得風雅力竹木供大官城邊
歸野鶴杳杳發長歎朱甍昔峩峩碧草今曼曼何如蔭
白茅容膝有餘安我哀喪亂餘人烟半凋殘風淒狐兔
警露重星斗寒丈夫坐一室此念馳九寰所以草堂人
安得千萬間

寄四明陳楸陽

四明在明州山有四門
通日月星辰之光故云

高人謝世紛誅茅在絕壁十年不下山
舊路掩深棘出門復踟躕觸步有崩石
下臨千仞淵毒鱗正紛籍腥風鼓洪濤
石齒鳴咋咋失勢倘一落萬縷那可及
不如息我軀猿鶴與朝夕

山中早行

短策穿幽徑山樵半掩扉
月斜林影薄石盡水聲微
犬隔籬吠孤僧何處歸
相逢松下立風露滿秋衣

答山中侃上人

竹房分半席流水白雲間
丹竈餘千載青鞵第幾山
有詩多解悟無髮得高閒
因笑塵中客重逢改舊顏

初夏病起

青衫蕉鹿夢江海一畸人
舊國愁生暮衰年病過春天
垂湖色湛雨洗月痕新
猶抱遺經在心銜覆載仁

答陳景賢

一劔挂寒壁艱危氣不衰
鬢痕朝鏡覺書味夜燈知
夢

斷潮生枕愁新鴈入詩思君心欲折又負菊花期

薛得之之江東簡熊西玉諸公

乍逢還又別龍竹葛陂陰野水流春遠江雲入暮深
新知滿湖海遺老在山林解后如相問憑君道素心

酬合沙徐君寅

合沙福州郡稱

歸鶴悠悠渡海遲閒來野寺看僧棋鄉心荔子熏風國
客路槐花細雨時天地一身愁自語江湖諸老澹相知
烏絲醉後淋漓墨片月涓涓照硯池

重遊鏡曲次韻

青眼重逢白髮新，舊游却恐是前身。
野鳩妒客招呼雨，江燕隨人管領春。
曾附仙舟追李郭，獨提詩律繼黃陳。
鏡中恨不移家住，山水蒼蒼老釣綸。

立秋日作

苦熱如焚想雪山，清高一夕破愁顏。
炎光斷雨殘虹外，涼意平蕪遠樹間。
忙踏槐花猶入夢，老催蒲扇共投閒。
城頭遙望纍纍塚，遼海荒寒鶴未還。

浙中饑甚六月一雨頗慰

雨餘燈火坐茅齋此夕田家有好懷造物心終扶馘
畝蒼生命已墮顛崖燕山漕粟初航海浙水移家半入淮
貞觀三錢誰復識擁衣數起望台階

王監簿南墅新樓樂成

王英孫號修竹會稽人仕至將作監簿素與先生友

善草命後先生游越多居其家

玉佩珊珊不可招眼空塵界等秋毫山林貞白三層迥
湖海元龍百尺高自笑行藏闊氣數肯將歌舞換風騷

卷簾最愛南山近坐聽松聲起碧濤

訪僧鄰菴次韻

拂石題詩滿袖嵐尋僧又過竹溪南乾坤浩蕩酒鄉寄
山水蒼寒琴意參老燕未歸同是客孤雲無住孰為菴
寂寥午夜松風響疑是神仙接塵談

述懷次柴主簿

獨閉柴門木石親詩筒剝啄不妨頻青燈風雨多離夢
白髮江湖少故人謾讀楚騷招太乙誰聽郢曲和陽春

書香劍氣俱寥落虛老乾坤父母身

次曹近山見寄

告春字問農平陽梅溪人
登咸淳第後以詩文著名

扣角歌殘夜正長懶將龜筴卜行藏
風烟萬里別離夢草木一溪文字香
仙泣銅盤辭渭水鶴歸華表認遼陽
愁來偶上西樓立耿耿寒奎色照霜

新晴偶出

琴床茶鼎澹相依偶為尋僧出竹扉
風動松枝山鵲語雪消菜甲野蟲飛
看花春入桄榔杖聽瀑寒生薜荔衣

古寺無人雲漠漠溪行喚得小船歸

雲門即事

雲門山在會稽南三十一里今名雍熙

最愛林中過客稀坐分片石澹忘歸僧閒時與雲來往
鶴老不知城是非瀟灑山光秋入畫清寒花氣曉侵衣
一溪截斷紅塵影西有任公舊釣磯

寄林編修

名千之字能一平陽人

大雅凋零尚此翁醉鄉一笑寄無功衣冠洛社浮雲散
弓劍橋山落照空東魯有書藏古壁西湖無樹挽春風

巾車莫過青華北城角吹愁送暮鴻

題海上人棲雲樓

水村烟景隔晴霏十二闌干在翠微一壑暮年間獨倚
半簷秋影澹相依栢爐貝葉香猶潤紙帳梅花夢不飛
會得此中無所住來來去去總玄機

催梅

參橫月落幾相思第一春風向此期乘興竹筇霜後路
寄聲籬落水邊枝禁中鼓絕花奴老海上宮深鳥使遲

獨抱素心誰是伴
羅浮仙夢隔天涯

題陸放翁詩卷後

天寶詩人詩有史
杜鵑再拜淚如水
龜堂一老旗鼓雄
勁氣往往摩其壘
輕裘駿馬成都花
冰甌雪椀建溪茶
承平麾節半海寓
歸來鏡曲盟鷗沙
詩墨淋漓不負酒
但恨未飲月氏首
牀頭孤劍空有聲
坐看中原落人手
青山一髮愁濛濛
干戈已滿天南東
來孫却見九州同
家祭如何告乃翁

夢回

夢回荒館月籠秋何處
碓聲喚客愁深夜無風
蓮葉響水寒更有未眠鷗

聞蟬

近交紙薄雲翻手
舊夢冠空雪滿顛
却憶畫船曾聽處
夕陽高柳斷橋邊

與邵德芳三首

聚散雲萍亦偶然
十年曾此繫秋船
當時別意芙蓉老

不道相逢又十年

年少同游古辟雍
文光萬丈掃秋虹
不須舊事談如夢
燈下相看亦夢中

葵心戀日還終在
橘性踰淮已不同
誰識鱸江持釣手
曾辜月窟一枝紅

別王監簿

玄髮相逢雪滿顛
一番欲別一淒然
離亭落日馬嘶渡
舊國西風人喚船
湖海已空彈缺夢
山林猶有著書年

蓬萊不隔青禽信還折南枝寄老仙

夢中作四首

元兵破宋河西僧揚勝吉祥行軍有功因得於杭置江淮諸路釋教都總統所以管轄諸路僧人時號揚總統盡發越上宋諸帝山陵取其骨渡浙江築塏于宋內朝舊址其餘骸骨棄草莽中人莫敢收適先生與同舍生鄭撲翁等數人在越上痛憤乃不能已遂相率為采藥者至陵上以草囊拾而收之又聞理宗顛骨為北軍投湖水中因以錢購漁者求之幸一網而得乃盛二函託言佛經葬于越山且種冬青樹識之會元時作詩不敢明言其事但以夢中作為題下

篇冬青花亦此意也

珠亡忽震蛟龍睡軒敞寧忘犬馬情親拾寒瓊出幽草

四山風雨鬼神驚

一坏自築珠丘土
雙匣猶傳三國經
獨有春風知此意
年年杜宇泣冬青

昭陵玉匣走天涯
金粟堆前幾莫鴉
水到蘭亭轉嗚咽
不知真帖落誰家

珠鳧玉鴈又成埃
斑竹臨江首重回
猶憶年時寒食祭
天家一騎捧香來


冬青花

冬青一名女貞木一名萬年枝漢宮
嘗植後世因之宋諸陵亦多植此木

冬青花花時一日腸九折隔江風雨暗影空五月深山
護微雪石根雲氣龍所藏尋常螻蟻不敢穴移來此種
非人間曾識萬年觴底月蜀魂飛遶百鳥臣夜半一聲
山竹裂

宋詩鈔卷一百三

謹案卷一百一第一頁後六行巴延舊作伯顏今
改後仿此



總校官庶吉士臣張能照

校對官助教臣金學詩

謄錄監生臣江長鎰